



IOannes natus est honestis parentibus Selestadij anno 1490. Ibi cum felici ingenio esset præditus, in celeberrima schola Selestadiana præceptore Hieronymo Gebuuilero operam literis dedit, atq; prima rudimēta feliciter iecit, præsertim cum Beatus Rhenanus eius studia moderaretur. Postea sese Lutetiam Parisiorum contulit, atq; Beatū Rhenanum Aristotelis Oeconomica priuatim exponentem audiuit. Publicè uerò Stapulensem & Iodocum Clichtoueam. Cum hoc modo omnigenere literarum atq; in primis Poëtices instructus esset, in patriam redijt, atq; Ludimoderator constitutus fuit. Eam functionē is summa laude obiuit,

atq; optimos quosq; authores suis discipulis passim confluentibus enarrauit. Eo enim tempore Barbari scriptores è scholis explosi, atq; Sapidi consilio puriores literæ restitutæ fuerunt. Cum hoc modo egregiè pergeret, atq; Euangelij doctrina innotesceret, Ioannes amore religionis patriam reliquit, atq; Argentinam ueniens inter bonarum artium professores receptus fuit. In ea urbe suis uirtutibus omnibus innotuit, atq; celeberrimę scholæ ornamento exitit. Scripsit is Comœdiam Anabion seu Lazarum rediuuū, atq; Argentinæ 1539 edidit. Præterea uaria Epitaphia & Epigrammata. Multos etiam authores restituit, & emēdatiores publicauit. Cum hoc modo literis inuigilaret, atq; cunctis ueneranda canitie gratissimus esset, tandem anno circiter 1560 iam septuagenarius obiit, & Argentinæ honestè sepultus fuit.

Anon.